

## **Naqqiut**

Saqqummiussissut 16. aggusti 2023-meersumut taarsiut  
(Naqqiummi isertitaqarnermut missingiutit nangaassutilimmik tunngaveqarnerat  
itisilerneqarpoq)

**Umiarsualivimmiinnermut akileraarutit pillugit Inatsisartut inatsisaata  
allanngortinnera pillugu Inatsisartut inatsisissaannut siunnersuut (Umiarsuarni  
takornarianik angallassisuni ilaasut akileraarutaannik atuutilersitseqqinneq)**  
(Aningaasaqarnermut, Naligiissitaanermut, Aatsitassanut, Inatsisillu Atuutsinneqarnerannut  
Naalakkersuisoq)

### **Saqqummiussissut**

#### **Siullermeenera**

Umiarsuarni takornariartaatini ilaasunut akileraarutip atuutilerseqqinnissaa 2023-mut aningaasanut inatsisip isumaqatigiissutiginerani Inuit Ataqatigiit, Siumup, Naleqqap, Demokraatit aamma Atassutip akornanni isumaqatigiissutigineqarpoq. Isumaqatigiissutip ilaaniippoq akileraarutinit isertitat umiarsualivinnik iluarsaassinerit aningaasaliiffiginerintut ilalersuuteqarnissaat. Tamannalu tunngavigalugu umiarsuarni takornarianik angallassisuni ilaasut akileraarutaannik atuutilersitseqqinnermut siunnersuut Naalakkersuisut sinnerlugit matumuuna saqqummiuppara.

Umiarsuarni takornariartaatini ilaasunut akileraarut atuutilerseqqitaq ilaasumut ataatsimut 50 kr.-ussasoq siunnersuutigineqarpoq. umiarsualivimmut tikinnermi ilaasut amerlassusaat kisinneqartassaaq. Taamaalisukkut umiarsuarnut takornariartaatitut angisuunut umiarsualivimmiinnermut akileraarutip marloriaatinngortinnissaa siunnersuutigineqarpoq, umiarsuarnullit takornariartaatitut mikinerusunut umiarsualivimmiinnermut akileraarut ullumikkut annerussuseqaannassasoq siunnersuutigineqarluni. Immikkut Nuup Umiarsualivianut siunnersuutigineqarpoq, umiarsuit takornariartaatit mikinerusut umiarsualivimmiinnermut akileraarutit mikinerusut akiliisinnegartassanngitsut, umiarsuarnullit takornariartaatitut anginerusunut akileraarummut akigititaq appartinneqassasoq.

Aamma ikaarsisitsinernut ataasiakkaanut tamanut umiarsuarni takornariartaatini ilaasunut ataasiakkaanut tamanut 50 kr. tikillugit avatangiisinut aserfallatsaaliuinnermullu akiliutissap aalajangernissaanut kommunit periarfissinneqarnissaat siunnersuutigineqarpoq. Sumiiffiit attuumassutilit tamakku toqqartornissaat, aamma akiliutissap annertussusaa, kommunit ataasiakkaat isumagisinnaassavaat. Ukiup siuliani kingusinnerpaamik ulloq 1. oktobarimi sumiiffiit akiliutissallu annertussusaa kommunit Akileraartarnermut Aqutsisoqarfimmut nalunaarutigissavai.

Sumiiffinni toqqagarisaannarni pinnani, aammali takornariartitsinermit annertunerulersumit toqqaannartuunngitsumik sunniivigineqartuni sumiiffinni akiliutinit isertat kommunit pinaveersaarutitut suliarisanut, atortorissaarutit tamaaneereersut aserfallatsaaliornernannut pitsanngortinnerannullu, atortorissaarutillu nutaat sananerannut atorsinnaavaat. Inatsit manna malillugu isertitat aningaasartuutillu kommunit pissarsiaralugillu akiliutigisai kommunit naatsorsuutaanni immikkoortitigaasassapput.

Allaffissorneq pissutigalugu umiarsualiveqarfimmut oqartussaqaarfimmut umiarsuarni takornariartaatini ilaasunut akileraarutitik, umiarsualiveqarfimmut akileraarummik, aamma kommunit akiligassanik pisarnissaa siunnersuutigineqarpoq, elektroniskinnngorlugulu immersugassami ataatsimi. Akileraaruseriffik kommunit ataasiakkaanut isertitanik ukiumut ataasiarluni tunniussisassaaq.

Umiarsuarni takornariartaatini ilaasunut akileraarutip atuutilerseqqinnera nalorninartortaartillugu 5 mio. kr.-t missaani annertunermik iluanaarutaasumik nassataqarnissaa missiliutigineqarpoq. Umiarsuarnut takornariartaatitut angisuunut umiarsualivimmiinnermut akileraarutip marloriaatinngortinnera, aamma umiarsuarnut takornariartaatitut aalajangersimasunut umiarsualivimmiinnermut akileraarummik naatsorsuisarnissamik pinngitsuuisitsineq, kiisalu Sikuki Nuuk Harbourimi umiarsuarnut takornariartaatitut angisuunut umiarsualivimmiinnermut akileraarut appartitaq nalorninartumik ilaqartillugu umiarsualivimmiinnermut akileraarutinit isertitanik 4-6 mio. kr.-nik annertusaassasut naatsorsuutaavoq. Avatangiisinut aserfallatsaaliuinnermullu akiligassaq annertuumik nalorninartortaartillugu kommunit ataatsimut isigalugit 15 mio. kr.-t missaanik isertitaqartitsinissaa naatsorsuutigineqarpoq.

Siunnersuummi missingiutit nangaassuteqarput. Siunissami umiarsuarni ilaasut, nunasinerit talinnerillu amerlassusaanut ilaatigut kommunit akiliutissarititai aamma inissisimaffii apeqqutaassapput.

Tusarniaanermut atatillugu tusarniaanermut akissutitik suliamut attuumassuteqartunik naleqquttunillu Naalakkersuisut tigusaqarput. Tusarniaanermut akissutit ilarpassui inatsisissamik siunnersuummut pitsannngorsaataasimapput. Iliuserineqarsinnaasut siunnersuutit pitsaasut aamma tiguneqarput, tamakkuli akitsuusiisarnermut inatsimmi malittarisassiuunneqarsinnaanatik. Naalakkersuisut tamakkununga ilanngutanut qujassuteqarput, siunissamilu takornariat pillugit periusissamut aamma suliniutissanut inatsisinillu allannguinnermi ilaatinneqarsinnaaneri eqqarsaatigissallugit.

Taamatut oqaaseqarlunga siunnersuut Inatsisartunut inussiarnersumik suliassannngortippara.